



REPUBLIKA E SHQIPËRISË
AUTORITETI I KONKURENCËS
KOMISIONI I KONKURENCËS

VENDIM
Nr. 443 , datë 30.11.2016

“Për
masat dhe detyrime për ndërmarrjet e sigurimit dhe disa rekomandime për Autoritetin
e Mbikëqyrjes Financiare mbi rivendosjen e konkurrencës në tregun e sigurimit të
detyrueshëm motorik për përgjegjësinë ndaj palëve të treta”

Komisioni i Konkurrencës me përbërjen e:

- | | | |
|-----------|-------------|------------|
| • Lindita | MILO (LATI) | Kryetare |
| • Servete | GRUDA | Zv/Kryetar |
| • Iva | ZAJMI | Anëtar |
| • Koço | BROKA | Anëtar |
| • Eduard | YPI | Anëtar |

Në mbledhjen e tij të datës 30.11.2016, me pjesë marrjen e Znj. Lindita Milo (Lati), Znj. Servete Gruda, Z. Koço Broka dhe Z. Eduard Ypi shqyrtoi çështjen me:

Objekt: Raportin e hetimit të thelluar në tregun e sigurimit të detyrueshëm motorik për përgjegjësinë ndaj palëve të treta (MTPL e brendshme).

Baza ligjore: Nenet 4 (pika1); 24 (shkronja d); 26; 43 (pika 5); 45 pika 2 dhe neni 70 i Ligjit Nr. 9121, datë 28.7.2003 “Për mbrojtjen e konkurrencës”, i ndryshuar (Ligji);

Komisioni i Konkurrencës pas shqyrtimit të: Raportit të Hetimit të Thelluar në Tregun e Sigurimit të Detyrueshëm Motorik për përgjegjësinë ndaj Palëve të Treta (MTPL e brendshme), të paraqitur nga Sekretariati i Autoritetit të Konkurrencës; Relacionit të Sekretares së Përgjithshme; Pretendimeve të ndërmarrjeve nën hetim të paraqitura me shkrim dhe verbalisht në seancat dëgjimore të datave 21, 22 dhe 24 nëntor 2016.

VËREN SE:

I. PROCEDURA E NDJEKUR

1. Komisioni i Konkurrencës nisur nga njoftimet në media me nismën e tij filloi procedurën e hetimit paraprak me anë të vendimit Nr. 430, datë 07.09.2016 “Për hapjen e hetimit paraprak në tregun e sigurimit të detyrueshëm motorik ndaj palëve të treta (MTPL e brendshme)”, mbi kufizimet, shtrembërimet apo pengimin e konkurrencës në tregun përkatës.
2. Gjatë periudhës së hetimit paraprak Sekretariati i Autoritetit të Konkurrencës ka kryer inspektime të befashme pranë ndërmarrjeve nën hetim sipas parashikimeve të nenit

sipas nenit 36 të Ligjit dhe janë administruar informacionet e nevojshme nga ndërmarrjet nën hetim dhe sipas nenit 34 është administruar informacioni i kërkuar nga AMF.

3. Në përfundim të procedurës së hetimit paraprak, rezultoi se ndërmarrjet nën hetim kanë rritur në të njëjtën ditë dhe në të njëjtën masë primin e shitjes së produktit MTPL e brendshme, dhe për këtë arsye me anë të Vendimit Nr. 435, datë 21.09.2016 filloi procedura e hetimit të thelluar në tregun e sigurimit të detyrueshëm motorrik ndaj palëve të treta (MTPL e brendshme).

II. PERIUDHA E HETIMIT DHE NDËRMARRJET NËN HETIM

4. Periudha e hetimit, e përcaktuar nga Komisioni i Konkurrencës në Vendimin Nr. 435, datë 21.09.2016 “Për hapjen e hetimit të thelluar në tregun e sigurimit të detyrueshëm motorrik ndaj palëve të treta (MTPL e brendshme)”, është janar-shtator 2016.
5. Ndërmarrje nën hetim janë shoqëritë e sigurimit Sigal Uniqa Group Austria Sh.a, Sigma Interbalkanian Vienna Insurance Group Sh.a, Atlantik Sh.a, Intersig Vienna Insurance Group Sh.a, Alb-siguracion, INSIG Sh.a, Eurosig Sh.a dhe Ansig Sh.a.

III. TREGU PËRKATËS

III.1.1 Tregu përkatës i produktit

6. Treg përkatës produkti do të konsiderohet tregu i sigurimit të detyrueshëm motorrik ndaj palëve të treta për produktin (MTPL e brendshme).

III.1.2 Tregu përkatës gjeografik

7. Të gjitha ndërmarrjet janë aktive në tregjet e produktit, nëpërmjet ofrimit të tyre, në të gjithë territorin e Republikës së Shqipërisë. Për vlerësimin e impaktit që shkakton ofrimi, tregu gjeografik do të konsiderohet tregu i brendshëm, pra Territori i Republikës së Shqipërisë.

IV. ANALIZA E KONKURRENCËS

IV.1.1 Pjesët e tregut

8. Procedura hetimore është mbështetur mbi dy çështjet kryesore sipas parashikimeve të nenit 4 të Ligjit, ndarja e pjesëve të tregut dhe caktimi i çmimeve të shitjes/blerjes apo çdo kusht tjetër tregtimi.
9. Pjesët e tregut sipas ndërmarrjeve gjatë kësaj periudhe në disa prej tyre paraqesin ndryshime, pra nuk janë simetrike pasi p.sh, kompania Insig Sh.a ka rritur ndjeshëm pjesën e tregut me rreth 41.61% për periudhën Janar – Gusht 2016 krahasuar me të njëjtën periudhë të vitit të mëparshëm. Edhe ndërmarrja Eurosig Sh.a ka rritur pjesën e tregut me 12.4%. Edhe ndërmarrjet e tjera siç shihet në Tabelën 1, kanë pasur ndryshime në pjesën e tregut për produktin MTPL e brendshme gjatë kësaj periudhe.
10. Gjithashtu, nga të dhënat e administruara gjatë fazës së hetimit, janë paraqitur në tabelën e mëposhtme pjesët e tregut të ndërmarrjeve nën hetim, për periudhën 1 – 20 shtator 2016, sipas vlerës së primit të shitjes së produktit MTPL e brendshme. Kjo periudhë i përket hyrjes në fuqi të primeve të reja të shitjes nga ana e ndërmarrjeve.

Tabela 1. Pjesët e tregut sipas vlerës së primeve të shitura për periudhën 1-20 shtator.

Burimi: Të dhënat e administruara nga shoqëritë dhe të përpunuara nga Autoriteti i Konkurrencës.

11. Pra, rezulton se struktura e tregu objekt hetimi ka qenë dinamike, pasi pjesët e tregut për secilën ndërmarrje nën hetim ka ndryshuar gjatë periudhës hetimore dhe nuk evidentohen sjellje të qëllimshme të ndërmarrjeve që të shkaktojnë ngurtësimin e tregut.

IV.1.2. Sjellja ndaj çmimit

12. Autoriteti i Konkurrencës ka realizuar inspektime për gjetjen e evidencave direkte dhe indirekte të një marrëveshje të ndaluar midis konkurrentëve ose të një praktike të bashkërenduar mes kompanive, lidhur me caktimin në mënyrë të drejtpërdrejtë ose të tërthortë të primeve të shitjes, ndarjes së tregut apo kufizimit ose kontrollit të tregut. Gjatë inspektimeve janë administruar materiale të nevojshme për hetimin për të bërë të mundur vlerësimin e kufizimeve të konkurrencës në treg.
13. Nga inspektimi i realizuar në shoqërinë e brokerimit “Star Broker” Sh.a, u gjendën shkresat e të gjitha shoqërive të sigurimit, të datës 23.8.2016 (me përjashtim të ANSIG që e ka dërguar shkresën një ditë më vonë) të cilat njoftonin shoqërinë Star Broker, e cila bën administrimin e sistemit të shitjes së policave të MTPL së brendshme, se shoqërite do të aplikonin çmime më të larta duke filluar prej datës 24 gusht 2016.
14. Nga evidencat e administruara, të gjitha shoqëritë e sigurimit kanë caktuar datën 24 gusht 2016, për aplikimin e çmimeve të ndryshuara për produktin MTPL e brendshme. Në zbatim të kërkesave të mësipërme shoqëria “Star Broker” Sh.a ka realizuar ndryshimin e tarifave për kategoritë MTPL në sistemin e shitjes në të njëjtën kohë në datë 24.08.2016 ora 00:00. Çmimet e njoftuara për Star Broker, me tabelat bashkëlidhur shkresave janë si më poshtë:

Tabela 2: Tabela me çmimet e ndryshuara me datë 24 gusht 2016 dhe diferencat mes shoqërive.

Burimi: Shkresat e Shoqërive të Sigurimit, drejtuar Star Broker Sha të përpunuara nga Autoriteti i Konkurrencës.

15. Referuar evidencave të shitjes së produktit MTPL e brendshme të marra nga “Star Broker” sh.a si dhe nga të gjitha shoqëritë e sigurimit gjatë periudhës së inspektimeve, rezulton se më datë 24 gusht 2016 ora 00:00, të gjitha shoqëritë e sigurimit kanë rritur çmimin e shitjes së produktit MTPL e brendshme në masën prej 16.7%, dhe me një çmim i cili ndryshon në mënyrë simetrike me diferencë prej 12 lekë nga njëra ndërmarrje tek tjetra, sipas renditjes së ndërmarrjeve referuar pjesëve të tregut, ku ndërmarrja me pjesë më të madhe tregu ka çmimin më të ulët deri tek ndërmarrja më e vogël me çmimin më të lartë. Diferenca nga çmimi më i ulët tek çmimi më i lartë është 84 lekë, për të gjitha kategoritë e MTPL.
16. Nga ana e Grupit të Punës kjo sjellje e shoqërive të sigurimit përbën një evidencë indirekte të një praktike të bashkërenduar e cila në kuptim të nenit 3, pika 4 të Ligjit “Për Mbrojtjen e Konkurrencës” (i ndryshuar) konsiderohet marrëveshje, e cila në bazë të nenit 4, pika 1 germa a është e ndaluar.

V. PRETENDIMET E PALËVE

17. Në zbatim të nenit 39 të Ligjit Komisioni i Konkurrencës përpara marrjes së vendimit përfundimtar dëgjoi palët në seancat dëgjimore të datave 21, 22 dhe 24 nëntor 2016 ku shoqëritë e sigurimit paraqitën prapësimet e tyre referuar raportit dhe marrjen e angazhimeve për rivendosjen e tregut në kushtet e konkurrencës së lirë dhe efektive.
18. Në pretendimet e tyre ndërmarrjet pretendojnë se tregu është i rregulluar nga Autoriteti i Mbikëqyrjes Financiare i cili ka përgjegjësinë ligjore për mbarëvajtjen dhe rregullimin e tregut si dhe të zbatimit në kohë të sistemit Bonus- Malus dhe se sipas raportit hetimor

konstatohet se "nuk janë evidentuar evidenca direkte të një marrëveshje të ndaluar në formën të shkruar për fiksimin e çmimit apo ndarjen e tregut ...", pra përjashtohet mundësia e evidentimit të një marrëveshje të ndaluar mes shoqërive të sigurimeve".

19. Ndërmarrjet nën hetim pretendojnë se çmimet midis tyre janë të ndryshueshme dhe nuk janë të njëjta dhe se nuk jemi para shkeljeve të pretenduara në nenin 4 të Ligjit sa i përket ndarjeve të tregut se nuk jemi në kushtet e ndarjes së tregut pasi ka ndryshme mes pjesëve të tregut të produktit përkatës nga një muaj në tjetrin dhe nga një shoqëri sigurimi në tjetrën.
20. Ndërmarrjet nën hetim pretendojnë se rritja e primeve të sigurimit MTPL e brendshme për të gjitha klasat ka ardhur për shkak të kostove të rritura që vijnë kryesisht nga taksa rritur nga 3 në 10 % dhe rritja e dëmeve të paguara mesatarisht me 30 %.
21. Shoqëritë e mësipërme, bazuar dhe në interpretim të nenin 45 të Ligjit nr. 9121, date 28.03.2003 "Për Mbrojtjen e Konkurrencës" (i ndryshuar) dhe Rregullores "Mbi procedurat e Angazhimeve", kanë paraqitur angazhimet e tyre sipas të cilëve, janë detyruese, krijojnë siguri ligjore, rivendosin konkurrencën në treg dhe sigurojnë ruajtjen efektive të saj në mënyrë të vazhdueshme, si më poshtë:
 - a) Lidhjen e me shume se një kontratave të shërbimit me shoqëritë e brokerimit dhe shoqëritë e agjenteve/agjente si persona fizike;
 - b) Rritjen e shërbimit ndaj të siguruarve sa i përket dëmeve dhe ofrimit të primeve të ndryshme të shitjes sipas kategorive të klientëve;
 - c) Bashkëveprimin me AMF-ne si rregullator tregu për diferencimin e primeve mbi bazën e riskut të të siguruarit. Shoqëritë pretendojnë se nga ana e tyre janë ndërmarrë të gjitha veprimet dhe angazhimet e kërkuara për të zbatuar sistemin e diferencuar BONUS/MALUS por kjo nuk është bërë e mundur për shkak të vakumit ligjor dhe nënligjor pasi siç jeni në dijeni është në procedurë rishikimi legjislativ "Mbi sigurimin e detyrueshëm motorik të mjeteve të transportit".

VI. RREGULLIMI I TREGUT

22. Tregu i sigurimeve në Republikën e Shqipërisë rregullohet nga Ligji Nr.52/2014, "Për veprimtarinë e sigurimit dhe risigurimit", i cili rregullon krijimin, veprimtarinë dhe mbikëqyrjen e shoqërive të sigurimit, risigurimit dhe ndërmjetësimit, me qëllim që tregu i sigurimeve të veprojë në një mjedis të sigurt, të qëndrueshëm dhe transparent, në mbrojtje të të drejtave dhe interesave të konsumatorit.
23. Kushtet dhe tarifat e sigurimit të detyrueshëm, përcaktohen në nenin 10, të Ligjit Nr. 10067, datë 12.02.2009, "Për Sigurimin e Detyrueshëm në Sektorin e Transportit", i ndryshuar dhe Ligjit Nr. 10455, datë 21.7.2011 "Për disa ndryshime në Ligjin Nr. 10 076, datë 12.2.2009 "Për Sigurimin e Detyrueshëm në Sektorin e Transportit". Sipas këtij neni, AMF-ja miraton rregullat për përcaktimin e kushteve të përgjithshme të sigurimit të detyrueshëm dhe nivelin e rezervave teknike dhe provigjoneve.
24. Gjithashtu, shoqëria e sigurimit përcakton vetë tarifat e primit të sigurimit, sipas kushteve të tregut, dhe fillon t'i zbatojë ato, pasi njofton zyrtarisht AMF-në. Pavarësisht tarifave të liberalizuara të primit të sigurimit të detyrueshëm, shoqëritë e sigurimit krijojnë rezervat teknike dhe provigjonet, jo më pak se niveli i rezervave teknike dhe provigjoneve, të përcaktuara nga AMF-ja.
25. Kur AMF-ja vëren se kushtet e përgjithshme të sigurimit nuk janë në përputhje me ligjin dhe aktet nënligjore, miraton vendime, të cilat trajtojnë mënyrën, sipas së cilës shoqëria e sigurimit duhet t'i përputhë ato.

26. Në të gjitha ndërhyrjet e Autoritetit të Konkurrencës në tregun objekt hetimi ka adresuar rekomandimet përkatëse për rregullatorin e tregut duke synuar garantimin e një tregu sa më konkurrues.

VII. NDËRHYRJET E AUTORITETIT TË KONKURRENCËS NË TREGUN PËRKATËS

27. Gjatë 10 viteve të fundit Komisioni i Konkurrencës ka përdorur të gjitha instrumentet në zbatim të legjislacionit të konkurrencës për rivendosjen e konkurrencës efektive në treg: vendosjen e gjobave të rënda sipas parashikimeve të neneve 4 dhe 74 të Ligjit, si dhe rekomandimet për entin rregullator të tregut përkatës për krijimin dhe nxitjen e konkurrencës në treg. Më konkretisht:

VII.1. MASAT ME GJOBË NDAJ SHOQËRIVE TË SIGURIMIT

28. Me vendimin nr.50 Datë 21.03.2007 "Për Vendosje gjobe ndaj shoqërive që vepronë në tregun e sigurimit të detyrueshëm, për produktin Policë Kufitare" Komisioni i Konkurrencës vendosi: ndalimin e akt-marrëveshjes së datës 05.04.2005 "Mbi themelimin e Pool-it të Sigurimit Kufitar të Përgjegjësisive ndaj palëve të treta të mbajtësit të mjetit motorik", dhe vendosjen e gjobës në masën 2% të xhiros të vitit 2005, ndaj shoqërive pjesëmarrëse në marrëveshjen e datës 05.04.2005 dhe konkretisht: Shoqërisë Sigma Sh.a, Shoqërisë Sigal Sh.a, Shoqërisë Atlantik Sh.a, Shoqërisë Intersig Sh.a, Shoqërisë Inter Albania Sh.a, Shoqërisë Albsig Sh.a, Shoqërisë Insig Sh.a, Shoqërisë Eurosig Sh.a,
29. Me vendimin Nr. 246 , datë 09.10.2012 "Mbyllja e hetimit të thelluar në tregun e sigurimit të detyrueshëm motorik ndaj palëve të treta (MTPL) dhe vendosje gjobe për kufizim të konkurrencës ndaj ndërmarrjeve "Sigal Uniq Group Austria Sha (Sigal)" në shumën prej 22.496.193 Lekë, "Sigma Vienna Insurance Group Sha (Sigma)" në shumën prej 14.050.348 Lekë, "Atlantik Sha" në shumën prej 11.141.914 Lekë, "Intersig Vienna Insurance Group Sha (Intersig)" në shumën prej 12.213.514 Lekë, "Inter Albanian Sha" në shumën prej 7.271.207 Lekë, "Alb - Siguracion Sha (Albsig)" në shumën prej 9,362,548 Lekë, "Instituti i Sigurimeve Sha (Insig)" në shumën prej 3,257,583 Lekë dhe "Eurosig Sha" në shumën prej 9,151,357 Lekë.
30. Në të gjitha rastet, Gjykata në vendimet përfundimtare ka vendosur shfuqizimin e vendimmarrjes së Komisionit të Konkurrencës duke e zhvlerësuar këtë instrument.

VII.2. REKOMANDIMET PËR AUTORITETIN TË MBIKËQYRJES FINANCIARE

31. Vendimi nr. 49 datë 21.03.2007 "Për disa Rekomandime të ndryshimeve në disa akte normative në fushën e sigurimeve", Komisioni i Konkurrencës i ka rekomanduar Ministrin të Financave shfuqizimin e plotë të Urdhrit Nr. 14, datë 6.5.2005 të Ministrin të Financave "Mbi shitjen dhe administrimin e policës kufitare nga BSHS" dhe urdhrave të tjerë në zbatim të tij, që lidhen me shpërndarjen e të ardhurave nga shitja e policës kufitare.
32. Vendimin nr.247, datë 09.10.2012 "Për disa rekomandime ndaj Autoritetit të Mbikëqyrjes Financiare në tregun e sigurimit të detyrueshëm motorik ndaj palëve të treta (MTPL)", Komisioni i Konkurrencës ka kërkuar "implementimin në një kohë sa më të afërt të sistemit Bonus-Malus, i cili do të krijonte mundësi për një diversitet dhe aplikim të primeve të ndryshme për çdo policë sigurimi të detyrueshëm motorik, duke rritur në këtë mënyrë konkurrencën midis kompanive që operojnë në këtë treg".
33. Vendimin nr. 254, datë 06.12.2012 "Për disa rekomandime ndaj Autoritetit të Mbikëqyrjes Financiare në tregun e sigurimit të detyrueshëm motorik ndaj palëve të treta" Komisioni i Konkurrencës ka rekomanduar "revokimin e Vendimit Nr. 151, date

- 29.10.2012 te Bordit te Autoritetit te Mbikëqyrjes Financiare, "Për miratimin e tabelës së primit të rrezikut për përlllogaritjen e provigjoneve teknike për sigurimin e detyrueshëm të përgjegjësishë së pronarit të mjetit motorik për dëmet që u shkaktohen palëve të treta nga përdorimi i këtij mjeti".
34. Vendimin nr.269, datë 18.02.2013 "Për disa rekomandime ndaj Autoritetit të Mbikëqyrjes Financiare në tregun e policës së sigurimit kufitar" Komisioni i Konkurrencës i ka rekomanduar Autoritetit të Mbikëqyrjes Financiare dhe Byrosë Shqiptare të Sigurimeve dhe të gjitha ndërmarrjeve të sigurimit: rishikimin, brenda afatit 1 muaj nga hyrja në fuqi e këtij vendimi, të kushteve të veçanta të Policës së Sigurimit Kufitar në mënyrë që shoqëritë e sigurimeve ta tregtojnë produktin "Policë kufitare" me emrin e secilës prej tyre, në mënyrë individuale.
35. Vendimin nr.325, datë, 30/07/2014 "Për disa rekomandime ndaj Autoritetit të Mbikëqyrjes Financiare për nxitjen e konkurrencës në tregun e sigurimit të detyrueshëm të mjeteve motorike për përgjegjësitë ndaj palëve të treta" Komisioni i Konkurrencës i ka rekomanduar AMF-së marrjen e masave rregullatore për vendosjen e tregut të sigurimit të detyrueshëm të mjeteve motorike për përgjegjësitë ndaj palëve të treta në kushtet e funksionimit eficient duke siguruar konkurrencën mes shoqërive të sigurimit nëpërmjet marrjes së masave si vijon:
- Të bëjë të zbatueshëm parashikimin ligjor për trajtimin e dëmit nga siguruesi i drejtëpërdrejtë sipas parashikimeve të ligjit nr.10076, datë 12.02.2009, "Për sigurimin e detyrueshëm në sektorin e transportit";
 - Të miratojë tabela të individualizuara të primit të riskut mbështetur në analizën e riskut sipas portofolit të shoqërive të sigurimit, karakteristikave të produkteve dhe strukturës së sigurimeve për çdo shoqëri sigurimi;
 - Të informojë Autoritetin e Konkurrencës në mënyrë periodike mbi vënien në funksionim të projektit Bonus-Malus deri në realizimin e plotë të projektit për individualizimin e primit të riskut sipas historikut të dëmeve të të siguruarit, 9 moshës së drejtuesit të automjeteve, vendbanimi dhe fuqia motorike e automjetit etj.
 - Të bashkëpunojë me Autoritetin e Konkurrencës në kuadër të projektit të asistencës me Bankën Botërore për rishikimin e kuadrit rregullator për produktet e sigurimit MTPL me theks të veçantë mbi teknikat e përlllogaritjes së provigjoneve të dëmeve nga produktet e sigurimit MTPL.
 - Të publikojë raportin dhe të dhënat financiare të shoqërive të sigurimit për të mundësuar konkurrencën e ndershme në tregun e sigurimeve mbështetur në Udhëzimin "Mbi rregullat e publikimit të të dhënave të shoqërive të sigurimit, shoqërive të brokerimit në kuadrin e transparencës ndaj publikut dhe mbrojtjen konsumatorë", me vendimin e Bordit të Autoritetit të Mbikëqyrjes Financiare nr. 11, datë 08.02.2007, dhe të sigurojë që "Shoqëria e sigurimit publikon raportin vjetor i cili përfshin raportin vjetor financiar dhe të dhëna të tjera të përfshira në këtë Udhëzim. Ky raport publikohet, jo më vonë se gjashtë muaj nga përfundimi i vitit kalendarik".
36. Historiku i vendimmarrjes së Komisionit të Konkurrencës në tregun përkatës si ndaj sjelljes së firmave ashtu edhe me rekomandimet e shumta për AMF-në tregon mungesën e vullnetit të rregullatorit dhe ndërmarrjeve nën hetim për moszbatimin e Politikës dhe Ligjit të Konkurrencës duke bërë inefficente ndërhyrjet e Komisionit të Konkurrencës në tregun e MTPL-së së brendshme.
37. Si konkluzion Komisioni i Konkurrencës vlerëson se në tregjet e rregulluara, entet rregullatorë dhe në rastin konkret AMF që gjatë kryerjes së detyrave për rregullimin e veprimtarisë ekonomike të subjekteve nën mbikëqyrje janë të detyruara të zbatojnë

dispozitat e ligjit 9121 date 28.7.2003 “Për mbrojtjen e konkurrencës” (i ndryshuar) dhe te sigurojnë konkurrencën e lirë dhe efektive në tregjet nën rregullim.

PËR KËTO ARSYE:

Komisioni i Konkurrencës, në mbështetje të nenit 45 pika 2 dhe nenin 70 të Ligjit Nr. 9121, datë 28.7.2003 “Për mbrojtjen e konkurrencës” (i ndryshuar),

V E N D O S I:

- I. Angazhimet e ndërmarrjeve objekt hetimi bëhen të detyrueshme në formën e kushteve dhe detyrime, si vijon:
 - a) Lidhjen e më shumë se një kontratave të shërbimit me shoqëritë e broke rimit dhe shoqëritë e agjenteve/agjente si persona fizike;
 - b) Rritjen e shërbimit ndaj te siguruarve sa i përket dëmeve dhe ofrimit te primeve te ndryshme te shitjes sipas kategorive te klientëve;
 - c) Marrjen e masave që në sistemet e tyre shoqëritë të mundësojnë sistemin e diferencuar BONUS/MALUS;

- II. T’i rekomandojë Komisionit të Ekonomisë dhe Financave të Kuvendit të Republikës së Shqipërisë të detyrojë Autoritetin e Mbikëqyrjes Financiare për marrjen e masave për të siguruar konkurrencën e lirë dhe efektive në tregun e sigurimit të detyrueshëm motorik për përgjegjësitë ndaj palëve të treta (MTPL e brendshme) nëpërmjet nxjerrjeve të akteve nënligjore lidhur me:
 - a. Zbatimin e plotë të sistemit Bonus/Malus për Sigurimin e Detyrueshëm Motorik ndaj Palëve të Treta duke diferencuar primet e sigurimit të të siguruarve sipas historikut të dëmeve;
 - b. Dëmshpërblimin e drejtpërdrejte për palët e siguruarra që do të rriste ndjeshëm konkurrencën mes shoqërive të sigurimeve;

- III. Ngarkohet Sekretari i Përgjithshëm për njoftimin e këtij vendimi pranë Sekretarit të Përgjithshëm të Kuvendit, Autoritetit të Mbikëqyrjes Financiare dhe palëve në hetim.

Ky vendim hyn në fuqi menjëherë.

KOMISIONI I KONKURRENCËS

Servete GRUDA

(_____)

Zv/Kryetare

Koço BROKA

(_____)

Anëtar

Iva ZAJMI

(_____)

Anëtare

Eduard YPI

(_____)

Anëtar

Lindita MILO (LATI)

K R Y E T A R E